



Apequteqaat aallaavigalugu Kalaallit Nunaat suli mingunnerusooq Inatsisartuni oqallisissiatut siunnersuutigineqarpoq.

(Inatsisartunut ilaasortaq Anders Olsen, Siumut)

Kalaallit Nunaat qorsuunerusooq sorpassuusinnaavoq. Qulequttat pissanganarut arlaqarput, mingutsitsineq, illoqarfimmik inerisaaneq qorsuunerusumik aamma nukinnik atuineq.

Uani sammissavarput nukinnik atuineq. Nunarsuarmi ajornartorsiutit ilarpassui nukinnik atuinermik peqquteqarput. Kalaallit Nunaanni ajornartorsiutit iluarsiniagassagut takkutilersut pissuteqarput nunarsuarmi inuit silap pissusaanik allanngoriartortitsinerannik. Immikkut pisussaaffeqarpugut suleqataaffigissallugu nukimmik atuinitta millisarneratigut aamma nukissiuutinik ataavartunik atuiartornertigut.

Tassani erngup nukinga atorlugit innaallagissiorfiutigut qitiulluinnartumik inissisimapput. Erngup nukinga ullumikkut taama sunnuteqartigimmat suliniutit arlallit aallartinneqareerput aamma pissusissamisuginnarpoq eqqartussallugu alloriarnerup tullia suussanersooq.

Immikkoortut innuttaasut ataasiakkaat nukimmik sipaaqataaffigisinnaasaat qissimikkaanni, allaat immaqa ataasiakkaat nukimmik atuinernut iluaqutaasumik, taava malittarisassat sanaagut ilaatigut aporfeqartitsipput iluaqutaanatik. Assersuutigalugu illorpassuit kiassaateqarfimmut ataatsimut atassuserneqarnikuupput, taamaasillutillu inissiarsuarni ineqartut kiassarnermut atukkaminut aningaasartuutit agguartarpaat imaluunniit ineqarfimmi aalajangersimasuni. Inuit ataasiakkaat kiassaatik sakkukillippatigut kiassarnermut sipaarniarlutik taava tamanna iluaqutaanaviangilaq, inissiarsuarni ineqartut sinnerisa kiassarnermik atuinertik taamaatsiinnarpassuk. Misissuinerit takutinikuuaat, inuit immikkuutaarlutik kiassarnermut akiligassinneqartaleraangata ataasiakkaat kiassarnermut sipaarutigisaraat 25 %-t missaat.

Iliuseqarfiusinnaasooq alla tassaavoq inuit ataasiakkaat namminneerlutik nukinnik pilersitsisinnaanerat soorlu seqernup kissarneranik iluaqutigalugu. Tassani innaallagiaq innaallagissaq aqputaa nalininnaasooq atorlugit nioqqutissanngortinneqarsinnaavoq, kisianni tamani periarfissaangilaq tamanna. Tamanna allanngortinniarsinnaavarput.

Aamma nutaaliaanerujussuit eqqarsaatigisinnaavagut soorlu smart-grinsit, soorlu biilit innaallagiartortut innaallagissamik pilersuinerimi inissiigallarfitut atorneqarsinnaapput. Tassunga



atatillugu soqutiginassaaq paasissallugu biilit bussillu innaallagiartortut amerlisarneqarsinnaanersut illoqarfinni erngup nukinga atorlugu innaallagissiorfeqartuni, ajornartorsiutitaqanngitsumik biilit immerneqarsinnaappata unnuakkut, piffissami innaallagissamik atuinikinnerpaaffiusumi.

Ataatsimut isigalugu soquqitiginassaaq inatsisit misissornissaat takuniarlugu allannguutit mikisuaqqat innuttaasunut ataasiakkaanut sipaarususitsilersinnaanersut imaluunniit nukimmik pilersitserusussuseqartitsilersinnaanersut.

Taamatut oqaaseqarluta Demokraatini oqallinneq pissanganartoq qujassutigaarput.